



Sabtu, 10 Agustus 2024

Ogen: Kejadin 31:13



Ingan Pusung Ndabuh



Patriotisme adalah keyakinan anda bahwa negara ini lebih unggul dari semua negara lain karena anda dilahirkan di dalamnya. Bageme kata si isehken George Bernad Shaw, kerna negara inganta tading. Jiwa patriot enda perlu kal iasuhi i bas dirinta alu bage rasa kebangsanta mbages seh maka keleng ateta negaranta. Kalak si keleng atena negarana rusaha ia mbangun bangsa negarana alu mehuli.

Renungenta wari enda nuriken kerna kegeluhen si Jakub anak Isak ras Ribka, kembar si Esau, si sedekah enda enggo tading i Haran ras mamana Laban. Enggo erjabu ia, dua ndeharana Lea ras Rahen, janah dua ka gundikna. Anak-anakna pe enggo nterem, kebayakenna pe luar biasa tapi ketedehen atena mulih ku negerina tetap lit amin ia enggo metua. Emaka kiam ia nadingken Laban, sabap piga kali atena mulih lalap iolangi Laban enda ia. Emaka ijumpai Dibata ia, ipetandaken Dibata man bana maka IA me Dibata si ijumpai ras Jakub i Betel, I je me nai batu peringet-ingeten ibahan Jakub paksa e. I je ia erpadan adi ibereken Dibata pangan ras inemen bagepe ibaba Dibata ia mulih ku rumah bapana, Tuhan e jadi Dibatana. Dibata mpersingeti kejadi edingen ateNa maba Jakub mulih ku tanheh inganna tubuh ndube.

Kalak Karo erbelas 'ingan pusung ndabuh' taneh kelahiren si laterlupaken. Ersada jiwa, semangat ras perjuangenna kerna negerina. Taneh ketubuhen ingeten i bas pusuh. Bageme pengalamen kalak Karo si ndauh ngerantau, tedeh atena lalap kuta kemulihenna sebagin nehken pedah, dimate ibaba kukuta.

Emaka adi ikuta dauh ia, ibegina lagu 'Taneh Karo simalem ntah pe piso surit' maler iluhna, ingeten pusuhna ku taneh kemulihen amin ia ringan i taneh perantaon. Bageme jiwa ras semangat kebangsaan/tanah kemulihen. Sipebelinlah e kita selaku kalak Karo rayat Indonesia. Pahlawanta nai enggo erjuang guna kemerdekaan, siisi alu mbangun negerinta enda.